



● EDITORIAL ● RAL VENGU ● CHHUNGKAW CHANCHIN

- ✚ 2012 Synod-in Pastor awmna hmun sawn tur a relte
- ✚ MizOram Presbyterian Kohhran Synod Inchiarna
- ✚ 2013 - 2-14 Synod Budget

RNI 68092/83 Regn. No. N.E. 1024

From

Synod Literature & Publication Board
Synod Office, Aizawl - 796 001,
Mizoram. Phone - 0389-2324590

SYNOD Newsletter

Volume XXVI

No. 351

E-mail : synodnews@gmail.com

DECEMBER, 2012

SYNOD INKHAWMPUI VAWI 89-NA A ṬIAK TA

* Hun ruat pangngaia rorel zawh hman a nih loh avangin ni khata pawh sei a ni

*Thil tihdanglam lian tak tak a awm avangin Synod chhinchhiah tlak tak a ni

Kum tina hman ṭhin, Mizoram Presbyterian Kohhran Inkhawmpui rorelnaa thu neitu sang ber, Synod Inkhawmpui chu December 3-10, 2012 chhung khan Chanmari Bialin Chanmari Kohhran Biak In, Aizawlah an thleng. Palaite dawngsawngtuten an chhinchhiah dan chuan palai inziak lut zawng zawng chu 1,915 an ni. India ram Presbyterian Kohhran hnuiaia Synod unau dangte zingah Ri-bhoi Synod leh Zou Synod tih loh, Synod dang zawng aṭangin palai an lo kal thei a, PCI General Assembly Moderator Rev. S.I. Iwphniaw-a leh Treasurer Rev. W.C. Khongwir-a te, National Council of Churches (NCCI) General Secretary Rev. Dr. Roger Gaikwad-a te chu ram pawn aṭanga Synod hmanpuitu langsar an ni. Tun ṭum Synod hi Synod hotute leh kum thum ṭang tur Board leh Committee member hrang hrang ruat thar kum a ni a; rorelna lamah pawh thil tihdanglam lian tak tak a awm baw a, Synod Inkhawmpui chhinchhiah tlak tak nia sawi theih a ni.

Synod Inkhawmpui Puipate chu heng mite hi an ni-

Moderator	: Rev. Lalramliana Pachuau
Secretaries	: Upa D.P. Biakkhuma (Sr.) Rev. H. Lalrinmawia (Jr.)
Finance Officers	: Rev. Zosangliana Colney Rev. Dr. Lalmangaiha
Statistician	: Upa C. Ngurthanmawia
Sr. Executive Secretary	: Rev. Vanlalzuata
Executive Secretary	: Rev. Lalzuithanga



Presbytery hrang hrang leh Synod Board/Committee-te aṭanga Synod Inkhawmpui rorelnaa ngaihtuah tura tih (General Agenda) 90 a awm a; thu inzûl deuh zual ṭhenkhat la kawpin 82-ah hlawm chhuah a ni a; thu rel tam ber chu Synod Executive Committee (SEC) bawhzui tura dah a ni a, 2013 Synod-a chhawp leh tura tih pawh a awm nual. Rorel tlangpui hetiang hian tar lang ila -

Thurel tura chhawp chhuah 90 zingah hian Synod Executive Committee bawhzui tura tih 20 a awm a; 'SEC-in zir chiangin Synod-ah thlen leh se' tia rel pasarih a awm baw. Rawtna lut anga remtih 14 a awm a, Ramthar Board bawhzui tura dah leh PCI General Assembly-a thlen tur pakhat ve ve a awm. 'Kan inhrilhfiah' tia thu tihtluk paruk, 'Kan sawihona a taw'k' tih panga, 'Kan kal dan ngai hi a ṭha' tih 12, 'Kan inchah' tih pahnih leh 'A hun lo/a ṭul lo' tia rel panga a awm. Hetiang hian a khaikhawm theih âwm e -

I. Rawtna anga thu tihtluk langsar deuhte -

1. 'Mizoram Chanchin Ṭha thlen ni' January 11, 1894 tia pawm ṭhin March 15, 1891 zâwk pawm tura rawtna pawm a ni a, he ni hi Rev. William Williams-a'n Kutbul Lui chhuah a lo thlen ni a ni. Ni pawimawh sawn hian kaihnhawih chi hrang hrang a neih dawn avangin chung kalpui zel dan tur chu SEC bawhzui tura dah a ni.
2. Zoram Hmeichhe Inkhawmpui Liana Lalpa Zanriah Sakramen theh tihtawp rawtna remtih a ni.
3. Synod Inkhawmpui 'Thua Inpawlhona' vawi thum buatsaih ṭhin chu vawi khat buatsaih tawh tura tih a ni a.

4. Missionary Training College (MTC) Bualpuia sawn tura lo tih tawh chu Senate of Serampore College University-in an pawm theih loh phah dawna hriat a nih avangin sawn leh lovin a hmun ngaia dah leh tura rel a ni baw. k.
5. Kohhran Ni Pawimawha Naupang pual programme siam chungchang chu chak deuha hma lak tura tih a ni.
6. Pastor nemngheh turten Thurin sawi laiin Thurin zawttu lam hawi tur.
7. Inneihna License-a 'Kohhran/Khua' tia inziak chu 'Kohhran' ti chauhva dah tawh tura tih a ni.
8. Synod rorelna hmuna Presbytery Agenda chhawp chhuah lohte chu SEC 229:12-in a lo rel tawh angin chhawp chhuah a nih loh chhan Secretary Report-ah tarlan ṭhin tura tih a ni.
9. Synod ruat Committee member ruat chu Nomination Committee-in fimkhur taka a kalpui zel tura tih a ni.
10. Nilai leh Beihruai Thupui, Home Mission zir lai tlawm zawka hralh a nih theih nan a chhut man za zela 25 chu Synod-in tumsak tura tih a ni.

II. Synod Executive Committee (SEC) bawhzui tura tihte -

1. Synod Office Account Section-ah eng lai pawha video thlalak rengna Closed Circuit Television (CCTV) dah;
2. Kan ram leilung humhalh leh enkawlina kawnga hma lak;

Phek 2-na ding lamah zawm a ni...

SYNOD Newsletter

EDITORIAL STAFF

Rev. K. Lalpiangthara (LPT)
Rev. B. Lalngkhakliana (BLNG)
Upa H. Ronghaka (HR)
Upa C.H. Thangkhuma (CTK)

Editorial

MAHNI INSAWIMAWI

Kan ram plolitics boruaka thil hriat ninawm tak, hriat tum loh pawha hriat loh theih loh, chhiar tum loh pawha kan chhiar leh mai thin chu - party dang theih tawpa sawi chhiatna leh mahni party sawi mawina thu hi a ni a. Tirkoh Paulan Korinth khuua mite hnena lehkhaka a thawna, "Mahni insawi mawi kan tan leh dawn ta maw?" a tih kha a takin kan chang leh tan ta! Party dang kan sawi chhiat duh dan phei hi chu kan Kristianna nen pawh hian a inhmeh lo hrim hrim a. Tarmit fiah zawk vuaha han inthlir phei chuan mahni awmna Konhhrana rawngbawltu zinga mi an lo ni ve leh thin baw si a, thil paw tak a ni. Politics khawvelah te hian a mawi i zawng ang u.

Politics platform-ah hi chuan mahni party hmalak tumna (manifesto) sawi mawi te pawh a leng vek mai a. Hei tak hi mipuite pawhin vote thlakna tur thu-ah ngaih dan siam kan thiamna pawh a ni thei. Mahni insawi mawi nana mi dang sawi chhiat tel kher leh dem zawnga zia tel kher chin hi mahni chak taw lohzia tar lanna tha tak a ni tih kan hriat hi a pawimawh khawp mai. Kan politics khel danah te pawh hian kan Lal Isuan a sawi ang khan miin kan chung a an tiha kan duh tur anga mi chung a thil kan tih ve a pawimawh a, Chutianging miin kan chung a an tiha kan duh loh tur pawh mi chung a tih loh theih hi kan Kristianna nen pawh a inmawi a ni.

MISSIONARY TRAINING COLLEGE HRIATTIRNA

Missionary Training College (MTC)-ah Bachelor of Missiology (B.Miss) zir duh tan dil theih a ni leh ta. Dilna Form hi office hun chungin MTC Office atangin lak chhuah theih a ni e.

Dil thei chin : CI-XII pass chin emaw, CI-X pass, kum 2 tal zina lamah leh rawngbawlna lama experience nei.

Dil theih ni hnunngung : February 28, 2013

Written Test : March 27, 2013

Interview : March 29, 2013

Principal
Missionary Training College
Mission Vengthlang
Ph No. 2310157/2301337/09612564113

Phek 1-naa mi zawmna...

3. Mizorama sakhaw dang hmalakna zir chian;
4. Nungcha humhalh kawngah chak zawka hma lak;
5. MLA inthlan lo awm tur puala rampum huap tawngtai rual neih.
6. Synod Pandal chung siamthat.
7. Hlamzuih tibo zawnka kawng zawn;
8. Ramthar rawngbawlna hmathlir siam leh Ramthar Enthatu Commission siam that;
9. MSSU rawngbawlna tihchangtlun dan tur;
10. Synod mi rawih ni lo, Official Duty-a tih damdawi ina awmte chhawmdawl chungchang;
11. Pastor Quarters tina Refrigerator dah;
12. Rinawmna inzirtir kawnga hmalak;
13. Synod Hospital atan Magnetic Resonance Imaging (MRI) lei;
14. Kohhran Inchhiarna Form tihchian;
15. HIV/AIDS chungchang inzirtirna buatsaih;
16. Kan Kohhran chhuahsan Isua ring tawh lote hruai kir leh tura hmalak;
17. Meghalaya Partnership-In-Mission rawngbawlna en that;
18. Synod Hospital dinhmun en thatna zut mam;
19. Thawktu lak tharte tana pension dan thar siam;
20. Pay Commission din.

VII. Inthlanna lam: Synod Executive Secretary-te, Administrative Secretary-te leh Department hotu thenkhat tan hun chung tura tih (term) a tawp avanga thlan thar tam kum a ni a, chung thlan chhuahte chu heng mite hi an ni -

Synod Executive Secretary (Sr.)
Synod Executive Secretaries

Secretary, Synod Mission Board
Administrative Secretary, Barak Area
Administrative Secretary, Chhim Bial
Administrative Secretary &
Partnership Consultant, Manipur Area
Director, Synod Hospital
General Manager, Prescom
Principal, Synod Higher Secondary School
Superintendent, Synod Office

III. Synod Executive Committee (SEC)-in a bawhzui hnua Synod-a thlen leh tur-

1. Synod Higher Secondary School-a zirlai tam zawk admit chungchang;
2. Mizoram pawn Presbytery kalphung;
3. Kan Kohhran mi, pawl dangin an ordained-te dawnawm dan tur;
4. Tunlai thiamna hmanga naupai leh fa neih chungchanga inkaihruai dan siam;
5. Chhim Bial Enkaw! Dan siam that;
6. Synod Administrative set up leh Management enthat;
7. Presbyterian Church in America thawhpui chungchang;

IV. "Kan inchah" tia relte -

1. Sakramente tun aia ngai pawimawh tur leh Kohhranin Programme a neih hrang hrangte pawh Sakramen neih hun nen indipdal lova kalpui turin inchah a ni.
2. Lalpa Zanriah Sakramen sem leh senghaw puithu zawka kalpui tura inchah a ni baw.

V. Synod Mission Board hmalakna tur

Ramthar rawngbawlna direct evangelism lamah tun aia nasa zawka hma lak leh budget pawh sum tam zawk dah.

VI. Rorelna sang zawk, PCI General Assembly-a thlen tur

Tripura Mission Field-a Presbytery-te kum 2016-ah Synod-a siam tura rawtna.

: Rev. Vanlalzuata (Thlan nawn)
: Rev. Lalzuithanga (Thlan nawn)
Rev. P.C. Pachhunga
: Rev. Lalchhuanmawia (Thlan nawn)
: Rev. Z.D. Lalhmachhuana
: Rev. F. Lalrinnunga

: Rev. R. Lalbiaknia
: Dr. Vanlalruata
: Upa R. Lalmalsawma
: Pu Rozama Chawngthu
: Upa F. Lalsangliana

Synod Pastoral Committee-in mawhpurhna bik nei, an awmnaa term hmang zo tawh hna bik thawk tura a dah zingah Rev. Zosangliana Colney chu, Director, SMTC-ah ruat a ni a, Rev. R. Lalchangliana pawh Director, Revival-ah ruat nawn leh a ni a, an term hmang zo tawh, an hna ngai atana Synod Mission Board-in a ruat pahni an awm baw a, chungte chu - Rev. Vanlalmuanpuia Kiangte, Field Secretary, Delhi leh Rev. Lallianmawia Pachuau, Field Secretary, Arunachal West te an ni.

VIII. Bial thar siamte: Kum 2012 Synod Inkhawmpui hian Mizoram chungah Bial thar pakua leh Ram pawn Mission Field-ah Bial hnih hawn thar turin a rel a. Chung bial thar pianna leh Bial thar hmingte chu -

1. Kulikawn Bial atangin **Tlangnuam Bial** siam a ni a
2. Zemabaw leh Sesawng Bial atangin **Airfield Vengthar Bial**

Phek 3-na ding lamah zawm a ni...



Râl Vêngtu chuan a venbûk chhim lama nu leh pahote chu a titi ngaithla tura sawm turin a thuihuai pakhat a tir chhuak a. Chhuanlam hrang hrang neiin a tam zawk chu an lo pha hlawm a. A sawm hmasak ber chuan, 'Krismas hmaa zawrh tur thawmhnaw lain phaiah ka kal a ngai a, ka lo kal hman lo,' a ti a. A pahniha chuan, 'Krismas vawk tur ka vulh hi chaw pek a ngai a, ka kal hman lo,' a ti a.

A pathumna chuan, 'Krismas-a thawmhnaw thar leina tur sum ka tuak dawn a, ka kal hman lo,' a lo ti bawk a. Râl Vêngtu sawmnaah chuan mi tlem tē chauh an kal ta a.

A thu leh hla ngaithla tur an kal tlem tak êmavang chuan Râl Vêngtu chu a thin a ur hle a. A kal chhun tlem tē hnenah chuan heti hian a sawi ta a. "Kumin Krismas hmang tura in inbuatsaih dan hi a tisa leh dawn hle mai maw! Rethei leh chanhaite pek tur pawisa tuak avang te leh thlarau leh tihtak zeta nausên chibai bûk theihna tura Bible chhiar leh tawngtai vangte a lo kal hman lo ni hlawm se chuan tha tur a ni a. Chutiang pawh ni lo; sum lama hlawk tuma Krismas atana inbuatsaih te, ei leh in tur thupua neih ringawt chung a inbuatsaih te leh nausên Isua aia thawmhnaw dah pawimawh zawkna chi hi vai ho *puja* hmang ang vel an ni a, Krismas a liam rual rualin an da leh a, anmahniah 'nung' hmuh tur a awm ngai lo.

"Krismas hman nawm in duh chuan tisa lamah ni lovin thlarau lam nunah tun ațangin inbuatsaih rawh u, chutah chuan Krismas tak a thleng dawn a ni." tiin mittui tla zawih zawihin a sawi a. A kal chhunte pawh tlem deuh mah se, Krismas dik tak hman theih dan tur thurûk pai hawa an inhriat avangin tifuh inti tak chungin an tîn ta hlawm a.

SYNOD OFFICE HOUR

Synod Executive Committee chuan Synod Officers' Meeting-in an rawt angin Synod Office hour tuna kal dan tidanglam deuhin zing lamah kumtluanin 9:30 a.m.-ah tan a ni tawh ang.

Hetiang hian office hour siam a ni -

9:30 a.m. – 4:00 p.m. – October – March

9:30 a.m. – 5:00 p.m. – April – September

Hei hi November 2012 ațanga hman tan tura tih a ni.

Phek 2-na zawmna...

- Keitum leh Hnahtial Bial ațangin **Bungtlang Bazar Bial**
- Lunglei Venglai Bial ațangin **Lunglei Bazar Veng Bial**
- Khawhai Bial ațangin **Khawhai North Bial, Khawhai South Bial leh Chalrang Bial**
- Sihphir Bial ațangin **Sihphir Vengthar Bial**
- Saiha Bial ațangin **Tuipang Bial**

Heng bakah hian Ramthar Field chhungah Bial pahniha hawn remtih a ni bawk -

- Guwahati Bial ațangin **Tejpur Bial**
- Dumka Bial ațangin **Jarwadi Bial**

IX A tlangpuia thirna: Kumin Synod hi Synod hnuiaa Committee leh Board member hrang hrang (kum thum term) ruat thar kum a ni bawk a; thu leh hla pawh a tam a; rorel hun chhung tura ruat lawk, Nilaini ațanga Inrinni chhunga rel zawh hman a nih loh avangin Thawhtanniah rorel hun pawh sei a ni a; December 10, 2012 (Thawhtanni) tlai dar 4:30-ah rorel chu zawh a ni.

A thlengtu, Chanmari Bial leh Inkhawmpui nghahna Chanmari Kohhran an fakawm hle a; he Inkhawmpui thlenna tura a thlengtu Bialin sum senso tura an ruahman chu Rs. 21,40,000/- a ni. Department hrang hrang an siamten an chanvo hneh tak vekin an thawk a, palaiten hahdam thlak hlein an hria.

Synod Inkhawmpui thlengtu tur hi a kum leh bakah a thlengtu lam lo inbuatsaihna hun a tam zawk theih nan kum thum chhung ruat lawk thin tura rel a lo nih tawh angin ruat lâwk a ni ta a; nakkum 2013-ah chuan Ramhlun North Bialin Ramhlun North-ah an thleng ang a, 2014-ah Mission Vengthlang Bialin Mission Vengthlang Biak Inah; 2015-ah Tuikual Bialin Tuikual Biak Inah, 2016-ah Durtlang Bialin Durtlang Biak Inah an thleng ang.

X 2013 Synod Puipa turte: Nakkum Synod Inkhawmpui Puipa turin heng mite hi ruat an ni -

Moderator	:	Rev. K. Lalhmuchhuaka, Dawrpui Vengthar
Secretaries	:	Rev. H. Lalrinmawia (Sr.), Mission Veng Upa H. Zoliana (Jr.), Durtlang North
Finance Officers	:	Rev. Lalzuithanga, Mission Veng Rev. Dr. R. Lalbiakmawia, Venghlui
Statistician	:	Rev. K. Lalthangmawia, Chhinga Veng

MIZORAM SYNOD 2012 KOHHRAN INCHHIARNA KHAIKHAWMNA

1. Presbytery zat	-	50
2. Pastor Bial zat	-	277
3. Kohhran zat	-	1,183
4. Kohhran indang lo zat	-	768
5. Minister zat	-	481
6. Pro. Pastor zat	-	50
7. Kohhran Upa zat	-	4,784
8. Pem Upa zat	-	394
9. Dan zawh kim zat	-	3,89,814
10. Kohhran Member zat		
Mipa	-	2,88,514
Hmeichhia	-	2,92,719
Belhkhawm	-	5,81,233
11. Chhungkaw zat	-	12,4015
12. Pawl dang ațanga lo pakai-	-	5,332
13. Nau piang zat	-	10,732
14. Mitthi zat	-	3,204
15. Ziak leh Chhiar thiam zat	-	4,68,792
16. Damdawi In zat	-	1
17. Dispensary	-	45
18. Doctor zat	-	31
19. Nurse zat	-	258
20. Nurse zirlai	-	120

SYNOD BUDGET 2013 -2014

Synod wawi 89-nain a pawm nakkum Tangka Kum thara Synod Budget tlangpui hetiang a ni -

HMUH TUM LAM KHAIKHAWMNA

A. PASTORAL

Sl.	Head/Deptt.	Amount (₹)	Za zelah
1.	(1) Pathian ram, etc.	63,96,55,000	43
	(2) Communication	9,97,25,000	6
	(3) Synod Hospital	17,43,80,000	13.17
	(4) Education	2,86,51,000	2.10
	(5) Dept. dangte	79,66,000	0.62
	Pastoral Total	97,27,74,000	66.21

B. MISSION

(1) Ramthar, etc.	45,93,64,000	31.27
(2) Field Receipt	3,70,56,000	2.52
Mission Total	49,64,20,000	33.79
Grand Total	1,46,91,94,000	100

HMAN TUM LAM KHAIKHAWMNA

A. PASTORAL

Sl.	Head/Deptt.	Amount (₹)	Za zelah
1.	(1) Synod Office	50,48,54,000	34.36
	(2) Aizawl Theo. Col.	5,20,77,000	3.54
	(3) Education	5,63,32,000	3.83
	(4) Communications	10,70,05,000	7.28
	(5) Synod Hospital	25,25,06,000	17.19
	Total	97,27,74,000	66.21

B. MISSION

(1) Mission	49,64,20,000	33.79
GRAND TOTAL	1,46,91,94,000	100



Keitum Dintar Kohhran chuan Sept. 15 - Oct. 5, 2012 chhung khan Tv. R. Lalruaimawia, (Kros Fate Team) ruaiin Chhandamna Camping an buatsaih a, Camp-a lut zawng zawng hi mi 744 lai an ni a; camper zingah hian Kohhran pawl dang - UPC, (NE) SA, IKK mi eng emaw zat an tel a, Kohhranah harh tharna lawmawm tak a thleng a. October 8, 2012 khan Kohhranhoten Pathian chawimawina ruai an buatsaih a, hlim takin tisa leh Thlarau lam ruai an kil ho.

New Serchhip Kohhran chuan September 17 - October 7, 2012 chhung khan Pu Lalsanglura Ralte, Speaker-a hmangin Camping an buatsaih a. Camp-a lut 594 zinga 85 chu Kohhran pawl dang mi an ni. He rawngnawlnaah hian Pathian hnathawh ropui tak a lo lang a, Kohhranhoten an hlawkpui hle. Camp bawhzuina hman a nih laiin Pi Lalhlmpui te unau, New Serchhip Bazar Vengten Pathian chawimawin nan leh lawmthu sawi nan vawk an thawh a, Kohhranhoten tisa leh Thlarau lam ruai hlim takin an kil ho bawh.

Vapar Kohhran chuan Sept. 28. - Oct. 10.2012 chhung khan Kros Hnehna Maicham Team Speaker, Pu Vanlalchhuanawma ruaiin Crusade leh Camping an buatsaih a. Camper an lut tha hle a, Kohhran mi inphalten pawisa, buhfai, chawhmeh leh thil dang chi hrang hrang an thawh khawm nasa hle a; Kohhranah harhna lawmawm tak a thleng. October 10, 2012 khan T. Upa Mungsianthangan Kohhranah vawk a pe a, taksa leh thlarau ruai theh bawh a. Kohhranhoten he rawngbawlna hi an hlawkpui hle.

Khawzawl Vengthar Kohhran chuan October 22 - Nov. 9, 2012 chhung khan Lalsanglura Ralte (Sons of God Ministry) ruaiin Gospel Camping chhawng li an buatsaih a. Camp-a lut zawng zawng 589 an ni a. Thlarau lama pachhia leh hnungtawlh tawhte leh ruih theih thila harsatna tawkten siam thar lehna an chang a, Kohhranin an hlawkpui hle.

Phunchawng Kohhran chuan Oct. 27 - Nov. 18.2012 chhung khan Church Revival Team-te ruaiin Chhandamna Camping chhawng thum an butatsaih a. Campers 157 lutin zu zuar leh zu in thintan an sual simin harh tharna lawmawm tak an lo chang a. Kohhranhovin an hlawkpui hle.

Haulawng Pastor Bial Upa te, Kohhran Hmeichhia leh K.T.P hruaitute mi 22 lai chuan kumin November thla tir lam khan Zemabaw Kohhran tumsakin Aizawl leh a chheh vela Synod hmun pawimawh hrang hrang - Synod Office, Hospital, ATC, SMTC, MTC, Higher Secondary School, PC Girls School, Press & Bookroom leh hmun pawimawh dangte chu Zemabaw Kohhran Upate leh Pro Pastor kaihruainain an fang a. A kalten Kohhran ropuizia leh Kohhranin Pathian malsawmna a dawn nasatzia te an hmuhin sawi nuam an ti em em mai a, a, manhla an ti hle. Chhim lama Kohhranten Synod hmun pawimawh an rawn hmuh ve theihna tura Aizawl lam Kohhran lian zawkten sum leh tha an lo seng thin hi chhim lam Kohhran tan nghehna leh hmasawmna nasa tak a nih an beisei.

THU THAR: Synod OM chuan Pastor leh Pro Pastor dah ngheh (Induction) neih hun atan January 13, 2013 (Pathianni) a ruat.

2012 SYNOD-IN MINISTER/PASTOR A TAWH CHETTE AWMNA TUR

S/No	Hming	Awmna thar tur	S/No	Hming	Awmna thar tur
1	P.C. Pachhunga	Executive Secretary	45	Munsi Hembrom	Jarwadi (Jharkhan)
2	F.Lalrinnunga	A/S Lunglei	46	C.K. Lalchhanhima	Basirhat (Kolkata)
3	R.Lalbiaknia	A/S Manipur Area	47	K. Lalchhuanawma	Kanghmun
4	Z.D. Lalhmachhuana	A/S Barak Area	48	C. Lalmalsawma	Khuangleng
5	Thangzauva	Ramhlun	49	H.L. Thianghlina	Phullen
6	Dr. C.Chawngmingliana	Tiangnuam (Bial Thar)	50	Lalmakpuia	Vairengte
7	J. Lalremsiana	Durtlang	51	R. Lalhmuchianga	Zobawk (Lunglei)
8	Ralthansanga Ralte	Bethlehem Veng	52	H. Malsawmzuala	Zokhawthar
9	Zosangliana Colney	Director, SMTC	53	Lallungmuana	Hamren (Karbi Anglong)
10	H. Lalrinawma	Kawlkulh	54	M.S. Dawngliana	Biate
11	Lalrinthara	Lecturer, MTC	55	Lalchhandama	Lallen
12	Lalengzika	Bilkhawthir North	56	Lalbiaksanga Pachuau	Kawrtethawveng
13	F.H. Liansangzuala	Lecturer, Bishop's Col.	57	Zodinpuia	Rae Bareilly (Lucknow)
14	Lalrokhuma Hmar	Chaplain, MCC, Chennai	58	R. Zoramthanga	Lawngtlai Chanmari
15	K. Lalthanhlua	N. Vanlaiphai	59	R. Vanlalngena	Koilamati (Karbi Anglong)
16	K. Lalthanpuia	Director, Masihi Sangati	60	Lalthanzuala Chawngthu	Karimganj
17	K. Lalchhuanawma	Lecturer, ATC	61	H. Lalthanthanga	Sihphir
18	R.K. Lalnunmawia	Kathmandu	62	Dr.C. Lalramliana	Teacher PBS
19	Lalawmpuia Hauhnar	Chaplain, CMC Vellore	63	Lalrosiana	Muallungthu
20	Daniel Lalmalsawma Saito	Katari, Nepal	64	Mohanlal Tudu	Dumka (Lit. Worker)
21	Lalrinmawia	Kulikawn	65	Vanlalmuanawma	Jugia (Jharkhan)
22	G.Chhunthuama	Bawngkawn	66	Kelvin Teron	Silonijan
23	B. Lalnghakliana	Armed Veng	67	H.C. Khaichho	Tuipang
24	Lalsangbera	Vaivakawn	68	Genlianpau (Manipur Area)	Sharonphai
25	Lalremruata Ralte	Maubawh	69	Paulalsiam (Manipur Area)	Phailianbung
26	John Raldosanga	Saitual	70	Kanga (Manipur Area)	B. Phainuam
27	C.Sapkaia	Hlimen	71	T. Ngam (Manipur Area)	D. Khawzim
28	Lalchhuanawma	Sihphir Vengthar	72	Gintinthang (Manipur Area)	Jiribam
29	K. Lalrammawia	Airfield Vengthar	73	Lalduhsaka	Damparengpui
30	F. Lalchhuanawma	Keifang	74	Malsawmsangzuala	Bungtlang South
31	K. Lalthanlzoa	Thenzawl	75	Lalawmpuia Hauhnar	Phainuam
32	Malsawmtluanga	Bungtlang Bazar	76	R. Lalmalsawma	Chawngte 'P'
33	V. Lalkima	Mamit	77	C. Vanlalmalsawma	Rabung
34	H.S. Remmawia	Khawzawl Vengthar	78	Lalramchhana	Teikhang
35	Lalremliana	Bilkhawthir	79	H. Lalbiakhluna	Hmuntha
36	H. Lalzuiliana	Khawzawl Venglai	80	R. Lalnunenga	Kanhmun
37	H. Zalianchama	E. Phaileng	81	Lalhrualtuanga Pachuau	Tlabung Zodin
38	F.Lalsangkunga	W. Phaileng	82	Chawngmingliana	Zamuang
39	J.C. Lalramliana	N. Vanlaiphai D.D. Veng	83	K. Lalthlamuana	Vathuampui
40	J. Lalbiaknia	Chalrang	84	Lalengkawla	Vaphai
41	Lalhmuchhuaka	Lunglei Bazar	85	Johny Lalremfela	Lungsen
42	T. Chawikhuma	Khawhai 'S'	86	Lalthangvunga	Masihi Sangati, Azl 'N'
43	Thangchhuaka	Sialhawk	87	R.K. Lalawmpuia	Masihi Sangati, Azl 'W'
44	P.C. Lalrinchhuanga	Zote (Champhai)	88	Jimmy M.S. Dawngliana	Teipur

HRIATTIRNA

Synod Revival Thurel Lakkhawm a bua siam chu Bial tin te tan Synod Revival Office-ah lam theih a ni e. Mahni Bial/Kohhran ta tur a rang lama lam theih ni se a lawmawm hle ang.

Director
Synod Revival

NUPA CHUNGCHANG DAN LEH KOHHRAN PAWL DANG NENA KAN INKUNGKAIHNA DAN 2012 (Bu khata siam) a chhuak thar a. Minister/Pastor, Inneihna kawltu leh Kohhran copy pakhat zelin Synod Office 'Mamawh Lamnaah' lam theih a ni e.

SAWMNA

Darlung Pastor Bial chuan January 11-13, 2013 chhung khian *Silver Jubilee* an lawm dawn a. Silver Jubilee lawmna hmanpui tur hian an Bial chhunga lo awm tawh zawngte an sawm.

CO-ORDINATOR SIKSAWI

Synod Executive Committee wawi 241-na chuan Synod Department hrang hranga Synod Co-ordinator-te siksawin hetiang hian an awmna tur a siam -

1. Pi Lalrinkimi, MSSU-ah;
2. Upa F. Lalremthanga, Music-ah;
3. Pi Lalfakmawii, Kohhran Hmeichhiaah;
4. Upa H. Lalhmingmawia, Social Front-ah;
5. Upa Lalrinmuana, Ramthar
6. Dr. Robert S. Halliday, Synod Information
7. Upa Zonunmawia, Kristian Thalai Pawl

SL&PB member term thara thu turten Kristian Diary 2013 te, Puitling Sunday School Zirlaibu te, Nilai leh Beihruai Thupui bute SL&PB Office-ah lam theih a ni e. Mahni kal thei lo, mi dang chah chuan Aiawhna Lehkha kentir ni se a lawmawm hle ang - Editor, SL&PB